



Isalathiso: 20170208-8077

12/2/8/11/2

Imibuzo: R Larney

INgcaciso eMfutshane yeCandelo loPhuhliso noQuquzelelo lwaMaziko: 0001/2017

Iya: KuBalawuli (kwii-ofisi zezithili), kuBaphathi beeSekethe, kuBaququzeleli boVavanyo nakwiiNqununu zezikolo eziziprayimari nezezikolo eziziisekondari

Isihloko: Ukuhanjwa kwesikolo ngabafundi bamaBakala 4 – 11 ngethuba nasemva kweemviwo zikaJuni nezikaNovemba 2017

1. ISebe leMfundo leNtshona Koloni lizimisele ukuqinisekisa ukusetyenziswa kangangoko kwexesha lokufundisa nokufunda. Luxanduva, ke ngoko, lwesikolo ngasinye ukukhusela ixesha lokufundisa nokufunda kwanokunika inkxaso kwimfundo ngokupheleleyo kwiintsuku zesikolo eziyi-197 zizonke ngonyaka ngamnye, ngokungqinelana noMgaqo-nkqubo woKuhamba iSikolo kwaBafundi kaZwelonke (*National Learner Attendance Policy*).
2. Kucelwa bonke abasebenzi abasezikolweni nabakwii-ofisi zezithili baqaphele oku kulandelayo:
 - 2.1 Luxanduva lwesikolo ngasinye ukucwangcisa iprogram yesikolo yaso ngethuba nasemva kweemviwo kude kube lusuku lokugqibela lwekota yesikolo kwanokwazisa bonke abafundi, abazali kunye nee-ofisi zezithili ngokumalunga noku.
 - 2.2 Izikolo ezifundisa amaBakala 10, 11 no-12 (apho kusebenzayo oku) ziyakhunjuzwa ukuba akuvumelekile ukuqaliswa kweemviwo phambi kwe-**05 Juni 2017** ne-**13 Novemba 2017**. Nakuba kunjalo, izikolo zingafaka isicelo semvume yokuqalisa ngeemviwo zepzakthikhalo kumlawuli wesithili, phambi kwethuba kwizifundo ezithile.
 - 2.3 Izikolo ezifundisa amaBakala 7 – 9 akuvumelekile ukuba ziziqalise iimviwo zazo phambi kwe-**12 Juni 2017** ne-**13 Novemba 2017**.
 - 2.4 Izikolo ezifundisa amaBakala 4 – 6 akuvumelekile ukuba ziqalise ngeemviwo zazo phambi kwe-**13 Juni 2017** ne-**20 Novemba 2017**.

- 2.5 Kulindeleke ukuba bonke abafundi babe sesikolweni kangengeeyure ezintlanu (5) ubuncinane ngosuku ngalunye ngethuba lokubhalwa koviwo. Ngoko ke, ukuba isikolo siqala ngo-08:00, asivumelekanga isikolo ukubakhulula abafundi bagoduke engekabethi u-13:00. Ukulungiselela eli xesha lokukhululwa kwabafundi phambi kwethuba, makuqwalaselwe ukhuseleko nokuthuthwa kwabafundi. Kubalulekile, ke ngoko, ukwazisa abazali kwangaphambili ukwenzela ukuba bakwazi ukwenza amanye amalungiselelo.
- 2.6 Bonke abafundi mabahambe isikolo ngalo lonke ithuba loviwo, yaye oko akubabandakanyi abafundi beBakala 12, abaya kunikwa ilungelo leentsuku ezintlanu (5) zokungayi esikolweni ngeenjongo zokuba bafunde phambi kokuqala kweemviwo zeSatifikethi seMatriki sikaZwelonke.
- 2.7 Izikolo azivumelekile ukwazisa abafundi ukuba sisigqibo somfundi ngamnye ukuya nokungayi esikolweni zakuba zigqityiwe iimviwo kwikota leyo okanye xa bengabhali zimviwo okanye zimvavanyo.
- 2.8 Kulindeleke ukuba bonke ootitshala babe sesikolweni usuku lwesikolo olupheleleyo (iiyure eziyi-35 ngeveki nganye) ngethuba loviwo, kungakhathaliseki nokuba ngaba banemisebenzi yokugada abafundi okanye abanayo.
- 2.9 Ngosuku lokugqibela lwekota yesikolo abafundi mababe sesikolweni iiyure ezintathu (3) yaye ootitshala kulindeleke babe sesikolweni kangangeeyure ezintlanu (5) ubuncinane.
3. Kukhunjuzwa iinqununu ukuba zingenise iithayimthebhile zoviwo zazo kumphathi weseke the ubuncinane kwiiveki ezine (4) phambi kokuqala kweemviwo. Amagosa esithili aya kubeka esweni ukwenziwa kwale miyalelo.
4. Kucelwa iinqununu namabhunga olawulo ukuba bakuqwalasele ngokukodwa ukwenziwa kweeprogram zawo ngethuba leemviwo, ukwenzela ukuba kungaphulukwana nexesha elixabisekileyo lokufundisa nokufunda.

ISAYINWE: NGU-TS MATSELISO

USEKELA MLAWULI-JIKELELE WOPUHLISO NOQUQUZELELO LWAMAZIKO

UMHLA: 2017-02-14